



INFORME DI KOMISHON DI
ESTADO DESAROYONAN
DEMOGRÁFIKO HULANDA
KARIBENSE 2050

KRESEMENTU
DIRIGÍ

Konforme e Instellingsbesluit Staatscommissie Demografische Ontwikkelingen 2050 (Desishon di Institushon Komishon di Estado Desaroyonan Demográfiko 2050), a instituí e Komishon di Estado Desaroyonan Demográfiko 2050 komo un kolegio di konseho temporal dia promé di febrüari 2024, di akuerdo ku artíkulo 6, insiso un i tres di e di e Lei marko Kolegionan di Konseho. E supgrupo di trabou Hulanda Karibense a prepará i redaktá e informe *Kresementu dirigí* na nòmber di e komishon di estado kompleto entre promé di febrüari i 4 di yüli 2024.

SUPGRUPO DI TRABOU

R. (Richard) van Zwol, presidente
G.A.E. (Glenn) Thodé, vise presidente
T. (Tamara) van Ark, miembro di komishon
D.J. (Daniël) van Vuuren, miembro di komishon
L.J. (Luc) Alofs, eksperto eksterno
G. (Gerald) Berkel, eksperto eksterno
E.A. (Arthur) Sealy, eksperto eksterno

SEKRETARIADO

R.P. (Rob) de Werd, sekretario
M. (Michiel) Swinkels, sekretario athunto
K. (Kim) van Berkel, investigadó
S. (Selene) van Valen, sekretario di ofisina

E komishon di estado ta agradecido na NIDI pa e kontribushon via H.P. (Harry) van Dalen na e informe Kresementu Dirigí.

KOMISHON DI ESTADO

E komishon di estado kompleto ta konsistí di: R. (Richard) van Zwol, presidente – G.A.E. (Glenn) Thodé, vise presidente – M. (Monika) Sie Dhian Ho, vise presidente – H.A.G. (Helga) de Valk, vise presidente – F.L.H. (Floris) Alkemade – T. (Tamara) van Ark – L. (Louise) Elffers – M. (Mohammed) Essafi – J.C. (Tineke) Huizinga – M.G.T. (Marco) Pastors – P.J. (Paul) Scheffer – D.J. (Daniël) van Vuuren – I. (Isminta) Waldring – E.M. (Emma) van Zoelen.

Komishon di Estado
Desaroyonan
Demográfiko
Hulanda Karibense
2050

yüli 2024

[REDACTED]

[REDACTED]

[REDACTED]

[REDACTED]

[REDACTED]

KONTENIDO

1. INTRODUKSHON	
11 1.1 E karakter úniko di Hulanda Karibense	
12 Konteksto históriko	
13 Konteksto estatal aktual	
18 Eskala chikí, vulnerabilidad i elastisidat di un isla	
20 1.2 Pasonan analítiko i struktura di e informe	
20 Desaroyonan demográfiko	
21 Konsekuensianan sosial di desaroyonan demográfiko	
21 Perspektivanan di aktuashon dirigí riba 2050	

PARTI I: DESAROYONAN I ESENARIONAN DEMOGRÁFIKO

2. DESAROYONAN DEMOGRÁFIKO HULANDA KARIBENSE

28 2.1 Konfiabilidad di datonan demográfiko Hulanda Karibense	
29 2.2 Tamaño di poblashon i kresementu	
32 Desaroyonan nasementu i morto	
33 Migrashon	
36 Enbehesimentu i deshubenesimentu	

3. FORSANAN IMPULSOR TRAS DI DESAROYONAN DEMOGRÁFIKO

41 3.1 Enbehesimentu	
41 Di espektativa di bida mas haltu...	
46 ... pa kantidat abou di yu	

47 3.2 Migrashon	
48 Movementunan di migrashon	
59 3.3 Forsanan impulsor resumí	

4. PRONÓSTIKONAN HULANDA KARIBENSE

65 4.1 Pronóstiko tamaño di poblashon	
68 4.2 Pronóstiko komposishon di poblashon sigun edat	
71 4.3 Pronóstiko komposishon di poblashon sigun pais natal	

PARTI II: KONSEKUENSIA DESAROYONAN DEMOGRÁFIKO PA BONEIRU, SINT EUSTATIUS I SABA

INTRODUKSHON

5. BONEIRU

81 5.1 Espasio	
84 Demografia i alohamentu awor i na 2050	
87 Infrastruktura, fasilidatnan di utilidat i naturalesa	
89 Demografia i espasio 2050	
91 5.2 Ekonomia	
91 Kresementu ekonómiko	
96 Demografia i ekonomia	
102 Reflekshonnan di futuro 2050	
102 5.3 Fasilidatnan públiko	
102 Seguridat sosial	
106 Enseñansa	
112 Kuido	

6. SINT EUSTATIUS

- 118 6.1 Espasio
119 Demografia i alohamentu awor i na 2050
121 Infrastruktura, fasilidatnan di utilidat
i naturalesa
125 Demografia i espasio 2050
- 126 6.2 Ekonomia
126 Stagnashon ekonómiko
130 Demografia i ekonomia
134 Reflekshon di futuro 2050
- 135 6.3 Fasilidatnan públiko
135 Seguridat sosial
136 Enseñansa
143 Kuido

7. SABA

- 149 7.1 Espasio
149 Demografia i alohamentu awor i na 2050
152 Infrastruktura, fasilidatnan di utilidat
i naturalesa
156 Demografia i espasio 2050
- 157 7.2 Ekonomia
157 Stabilitat ekonómiko
159 Demografia i ekonomia
163 Reflekshon di futuro 2050
- 164 7.3 Fasilidatnan públiko
164 Seguridat sosial
166 Enseñansa
172 Kuido

PARTI III: PERSPEKTIVANAN DI AKTUASHON PA HULANDA KARIBENSE

8. KOHESHON SOSIAL, KRESEMENTU DIRIGÍ

- 189 8.1 Koheshon sosial
192 Linianan divisorio i di koheshon
sosal

196 8.2 Kresementu dirigí

9. ESKOHONAN RUMBO PA 2050

202 9.1 Perspektivanan di aktuashon

212 9.2 Finalmente

-
- 218 Epílogo
220 Desishon di institushon
222 Lista di literatura
228 Kolofon

INTRODUKSHON

Na novèmber 2022, Tweede Kamer a pidi gobièrnu via un moshon¹ pa tambe inklui e parti karibense di Hulanda (despues di esaki: Hulanda Karibense) den e tarea i enkargo di e Komishon di Estado Desaroyonan Demográfiko 2050.² Maske na e momentu ei ya a instituí e Komishon di Estado kaba i esaki ya a kuminsá hasi su trabou pa e parti oropeo di Hulanda (despues di esaki: Hulanda Oropéo), e tabata ke – despues di a skucha e petishon di Tweede Kamer – duna Hulanda Karibense un bon lugá den esaki. Sin embargo, pa por kuminsá hasi e trabou di konseho bon – di akuerdo ku e estudio preparatorio di e Ofisina Sentral di Statistik (CBS) i e Instituto Demográfiko Interdisiplinario Hulandes (NIDI) tokante Hulanda Oropéo – ainda tabatin mester di dato adishonal sí, tokante esenarionan demográfiko i nan konsekuensianan sosial pa Hulanda Karibense. Riba petishon di e komishon di estado, gabinete a pidi CBS i NIDI pa proveé esakinan. Despues di a kompletá e informe di e komishon di estado tokante Hulanda Oropéo, i despues di entrega di datonan adishonal dor di NIDI i CBS³, na febrüari 2024 e komishon di estado a kuminsá traha riba e konseho tokante Hulanda Karibense. E komishon di estado, a base di e desishon di su institushon, tabatin sinku luna di tempu pa esei.

E enkargo di e tarea di e komishon di estado pa Hulanda Karibense ta meskos ku pa e parti oropeo di Hulanda i e ta lo siguiente:

[...] Konsehá gobièrnu tokante esenario, opshon di maneho i perspectiva di aktuashon di gobièrnu en relashon ku konsekuensia sosial di desaroyo demográfiko den e Entidatnan Públiko Boneiru, Sint Eustatius i Saba, i partikularmente di enbehesimentu i migrashon, te por lo ménos 2050 i den e konteksto di e aserkamentu amplio di prosperidat.

E bista di e desaroyonan demográfiko na Boneiru, Sint Eustatius i Saba den e informe aki ta konsistí di algun variante, siendo ku tambe a wak e impakto sosial. Den bista di e propio responsabilidatnan di e paisnan Kòrsou, Aruba i Sint Maarten (CAS), e informe aki únikamente ta trata ku e Entidatnan Públiko Boneiru, Sint Eustatius i Saba (BES). For di 10 di òktober 2010, e tres islanan aki ta parti di Hulanda riba tereno estatal i atministrativo. For di e tempu ei, gobièrnu di Hulanda ta e gobièrnu di e islanan BES, támbe. Esei tambe tin un nifikashon pa e responsabilidat den e empeño di prosperidat amplio i e trato ku desaroyonan demográfiko den e sosiedatnan insular aki. E término Entidat Públiko ku ta hasi uso di dje den e informe aki ta prosedente di artíkulo 132a di Konstitushon, den kua ta regla ku den e parti karibense di Hulanda ta instituí i eliminá Entidatnan Públiko teritorial diferente for di provinsia i munisipio. Esaki ta e base riba kua den e Wet openbare lichamen Bonaire, Sint Eustatius en Saba (Lei Entidatnan Públiko Boneiru, Sint Eustatius i Saba) a regla e gobernashon lokal pa e islanan aki. Frekuentemente, tambe sa usa e término ‘munisipio spesial’ pa denominá e islanan aki. Sin embargo, e Entidatnan Públiko konosé funshonnan di munisipio í di provinsia, i p’esei e komishon ta hañ’é mas presis i pues mas deseabel pa usa e término ‘Entidat Públiko’ en bes di munisipio spesial.

Pa por fasilitá kontesta di e petishon di konseho adekuadamente, e komishon di estado hopi enfátikamente tabata ke organisá i posishoná e konosementu i ekspertisio ku ta pertenesé na Hulanda Karibense di forma sentralisá den e propio sírkulo. Di un banda, via partisipashon di un vise presidente èkstra i di otro banda, dor di realisá e informe aki for di den un grupo di trabou Hulanda Karibense, den kua, fuera di un parti di e komishon di estado, tambe tres eksperto tabatin asiento, kada un alabes ku ekspertisio spesífiko relashoná ku Hulanda Karibense. Ademas, e komishon di estado a hasi bishitanan di trabou na kada un di e tres islanan BES i einan a hiba diferente kòmbersashon ku entre otro hóbennan, trahadónan den kuido,

mandatario, empresario, i sindikato. Asina, e komishon di estado a hasi esfuerso pa inklui e punto di bista i e konteksto lokal a base di su propio opservashonnan den e informe aki. Durante redakshon di e informe aki, e komishon di estado enfátikamente tabata konsiente ku e informe aki ta tokante i (tambe) ta destiná pa e habitantenan di Boneiru, Sint Eustatius i Saba. P’esei den e konseho aki tin atenshon partikular pa nan preokupashonnan i retonan, awor i na 2050. A wak e desaroyonan demográfiko tambe dor di e enfoque aki. P’esei tambe, e komishon di estado tin konfiansa ku e informe aki ta rekonosibel i ta kuadra ku e realidat diario di kada un di e islanan di e parti karibense di Hulanda. Ademas, e komishon di estado a basa su rasonamentu enfátikamente riba e realidat ku e islanan BES ta parti di Hulanda, meskos ku por ehèmpel Hof van Twente. Na mes momentu a tene kuenta ku kada un di e islanan, fuera di e konteksto komun aki, tambe tin un konteksto kompletamente úniko. Tambe ta importante pa realisá ku e islanan BES ta partinan hopi ‘yòn’ di Hulanda: den e konteksto karibense di promé ku 10 di òktober 2010, e estado próspero, e sirkunstansianan sosial-ekonómiko i e demokrasia parlamentario a pasa den un desaroyo derivá for di Hulanda Oropé, pero tòg outónomo. P’esei, no ta posibel pa proyektá mayoria aspekto ku na Hulanda Oropé a konstruí a base di un linia históriko den un tempu largu, sin mas riba e parti karibense di Hulanda. E komishon di estado ta suprayá e importansia di ta konsiente di esaki – tambe den e informe aki.

1.1 E KARAKTER ÚNIKO DI HULANDA KARIBENSE

Pensa tokante demografia den e konteksto di e islanan BES, riba mas ku un tereno ta rekerí atenshon spesial, i p’esei tambe ta diferente for di pensa tokante demografia den e konteksto di Hulanda Oropé. Ounke ku e mesun faktornan manera enbehesimentu i migrashon ta importante pa análisis i interpretashon di kambionan demográfiko, e sirkunstansianan lokal i regional di Hulanda Karibense tambe tin influensia riba e manera ku e sosiedat na kada un di e tres islanan ta desaroyá su mes.

KAPÍTULO 9: ESKOHONAN RUMBO PA 2050

Tweede Kamer i e gabinete a pidi e komishon di estado pa wak i midi e efektonan di kambionan demográfiko rumbo pa 2050 pa Hulanda Karibense, pa basa posibel perspektiva di aktuashon pa gobièrnu, parlamento, i e Entidatnan Públiko riba esei. E perspektivanan di aktuashon aki ta enfoká riba mantenshon i fortalecimento di e prosperidat amplio. E informe ‘Gematigde groei’ (‘Kresementu moderá’) tokante Hulanda Oropeso publiká na yanüari 2024 a demostrá e urgensia di wak padilanti na tempu, i a deliniá e nesesidat pa prepará pa kambionan sosial ku un posibel impakto grandi riba prosperidat amplio. Por mira e urgensia aki tambe den e moshonnan di Tweede Kamer ku a hiba na institushon di e komishon di estado, i tambe den e petishon enfátiko di Tweede Kamer pa adishonalmente tambe wak Hulanda Karibense.

Tokante Boneiru, Sint Eustatius i Saba por bisa ku e urgensia ta por lo ménos mes grandi pa kuminsá traha riba e kambionan sosial ku ta na kaminda. Riba diferente tereno (espasio, ekonomia i fasilidat públiko) e informe aki a hasi visibel kiko ta e konsekuensianan di enbehesimentu i migrashon. Tambe a mensioná den e kapítulo anterior ku e konsekuensianan aki por profundisá e linianan divisorio den e diferente komunidatnan insular mas aleu. For di e punto di bista aki, e komishon di estado ta deskribí e perspektiva i

e nesesisdat di un ‘kresementu dirigí’: un kresementu demográfiko ku pa kada isla tin otro asento, pero ku ún mensahe kla: e nesesisdat di hasi eskoho i kuminsá traha ku esaki. Kresementu dirigí ta ofresé e posibilidat pa, a base di un imágen konhunto, pa kada isla sigui duna forma na e espasio, hasi esfuerso pa desaroyo ekonómiko dirigí, i pa mantenshon di e fasilidatnan públiko, tambe den e añanan benidero. Lógikamente, e esfuerso di mas aña aki riba diferente parti ta pidi un elaborashon mas aleu. Ku mira riba e enkargo i e tempu di durashon di algun luna—e komishon no tin e ambishon di elaborá esaki detayadamente, pero akibou sí ta indiká diferente posibilidat pa aktua. Ta na polítikonan i tur partido gubernamental i sosial pa duna forma mas aleu na esaki, ku e mesun urgensia ku kua a instituí e komishon di estado.

9.1 PERSPEKTIVANAN DI AKTUASHON

Parti I di e informe ta demostrá ku rondó di pronóstiko di poblashon tin sierto inseguridat. Tambe alabes a resultá ku no tin datonan disponibel pa tur (sup)tópiko i pa kada aña tokante Hulanda Karibense den e dékadanán ku ta tras di lomba. Tòg ta posibel pa, a base di e datonan ku sí ta optenibel i tambe a base di diferente kòmbersashon (sosal), deliniá ku ta hopi probabel ku kambionan demográfiko ta bai tin un impakto kla riba poblashon di e islanan BES. I esei ta pidi pa aktuashon. Analógiko na e informe ‘Kresementu moderá’, e komishon di estado aki tambe ta papia tokante ‘perspektiva di aktuashon’. Pasobra tin límite na e kapasidat di direkshon i kreashon di e tamaño i komposishon di e poblashon pa e 25 añanan benidero.

Apesar ku e diferensianan entre e variantenan di krem i kresementu abou òf hustamente kresementu haltu tambe ta kousa kambio den e perspektivanan di aktuashon, ku por ehèmpel un enbehesimentu kresiente, sigur ta posibel pa mensioná un forma di aktua mas amplio ku ta akapará tur. E echo ku desaroyo demográfiko ta difísil di pronóstika, ta eksihí *solides* di siudadano, e sosiedat sivil i gobièrnunan. Un aserkamentu efektivo ta pidi—tambe konsiderando e linianan divisorio sosial—tambe pa perspektivanan di aktuashon dirigí riba *konekshon*. Di e manera aki, *duna forma* aktivamente na un perspektiva deseá pa Hulanda Karibense por kontribuí na maneho robusto i preparashon na tempu riba e kambionan benidero. Esei no ta un tarea estriktamente di gobièrnu, pero pa ekselensia un binimentu huntu di

siudadano, empresario, partner sosial, i gobernashon. E ta pidi iniciativa i aktuashon desididu.

Ku e informe presente, e komishon di estado na promé lugá tin e propósito di duna un bista mas aleu i komprondementu di e desaroyonan demográfiko na Hulanda Karibense, i nifikashon sosial di esei, tantu awor i e despues. Asina, e partinan I i II riba nan mes ya ta un komienso pa profundisashon mas aleu. Manera a bisa promé, a resultá ku no tin mes tantu datonan optenibel pa kada tópiko. Na mes momentu, e material optenibel i e kòmbersashonnan hibá sí a duna un bista kla di enbehesimentu mas aleu i e nesesidat di kresementu dirigí. En bista di esei, tambe por mira e informe aki komo trabou di fundeshi pa yega na un agènda (adishonal) tokante un variedat di tema. Un agènda a base di desaroyo riba término largu i ku ta kontribuí na un aserkamentu robusto í fleksibilidat ora futuro desaroyá su mes diferente demográfikamente for di loke a spera.

Por ordená e perspektivanan di aktuashon ku e komishon di estado ke trese dilanti den kuater grupo: enbehesimentu, migrashon, fasilidatnan públiko i eskala chikí, i *governance*.

1. *Enbehesimentu*

E enbehesimentu kresiente lo bira un reto grandi na tur tres isla. E parti di e poblashon ku ta hasi trabou kontra pago lo baha, mas ainda den e variantenan unda por papia di tiki inmigrashon. Lo por sinti e parti di poblashon profeshonal ku ta bahando fuertemente partikularmente den kuido i enseñansa. Kontinuidat di e fasilidatnan públiko aki por kore peliger, simplemente komo ku tin muchu tiki personal pa ehekutá e tareanan nesesario.

Tin retonan den mehorashon di salubridat en general i bahada di e desigualdat den un espektativa di bida saludabel. E base pa esaki ta pone den e añanan di bida di mas yòn. Invertí den un start saludabel meresé prioridat apsoluto den e periodo benidero. Ku e demanda di kuido konsiderabel ku den futuro den tur probabilidad lo desaroyá su mes, invershon amplio den prevenshon i mehorashon di salubridat tin hopi balor. Ta importante pa presta hopi atenshon na e parti di poblashon relativamente grandi ku malesa médiko di durashon largu, meskos ku sobrepeso. Komo ku un poblashon ku un promedio haltu di grandinan sa tin un promedio mas haltu di hende ménos salú, e enbehesimentu ta hasi e problemátika aki mas urgente. Baha i prevení estilonan di bida insaludabel ku ta hiba na malesanan króniko tambe ta di gran importansia. Un motibu èkstra pakiko un poblashon salú ta bira mas importante, ta ku e empleabilidad di tur forsa laboral (potensial) ta hopi nesesario pa por mantené fasilidatnan públiko. Promoshon di konosementu i otro programa sosial ku ta kontribuí na esaki enfátikamente meresé atenshon. Proyektu i programa riba tereno di

kuminda saludabel òf mikro agrikultura tambe por tin gran nifikashon, mirando e gastunan sosial konsiderabel ku lo bini si no hasi esaki. Bahada di diferensianan sosioekonómiko for di e añanan di bida di mas yòn manera dor di bon aksesio na akohida di mucha i enseñansa, ta di gran importansia. Tambe e aksesibilidat di e oferta di kuido, tantu den kuido básiko komo kuido di grandinan lo bira mas krusial den e periodo benidero.

Ku un kantidat kresiente di grandinan—tambe inkluso e grupo di ‘grandinan di edat mas avansá’ di riba 80 aña—invershon na tempu den alohamentu adekuá i kualitativo tambe ta nesesario. Aksesibilidat di alohamentu kualitativo lo mester subi konsiderablemente, den proporshon ku e grupo di grandinan ku por spera na kada isla. Lugánan èkstra unda por kombiná kuido i bibienda ta nifiká un invershon fisiko, pero tambe un kòmbersashon mas amplio ku e sosiedat tokante kiko bira mas grandi ta nifiká, i ken e ora ei ta hasi kiko pa un i otro. Ku alkanse di un edat kada bes mas haltu, komo konsekuensia di kresementu di e nesidat di asistensia, e posibilidat pa sigui biba independientemente na kas bou di e mesun sirkunstansianan ta baha. Sigur kaminda e salú ta bai atras, esaki por pidi formanan di biba diferente. Tambe e ta pidi adaptashon di e ambiente di bida pa hasi mobilitat posibel, i pa por tene kuenta ku sirkunstansianan fisiko. Na Saba, e karakter di e isla tambe ta determiná e espasio públiko; hustamente einan, mobilitat lo bira un problema mas grandi pa grandinan, ku e kamindanan i hanchinan pará i e kantidat grandi di trapí. Pero na Sint Eustatius i Boneiru tambe, adaptashon di e espasio públiko na un poblashon mas grandi ainda lo rekerí un esfuerso konsiderabel.

E skarsedat riba merkado laboral ku lo krese dor di enbehesimentu, pa dunadónan di trabou i empleadonan den e sektor públiko i privá ta nifiká ku mas i mas, nan lo mester papia tokante sigui traha mas largu i ku tur dos partido lo mester hasi esfuerso aktivamente pa hasi trabou saludabel i produktivo na edat mas haltu posibel.

Efisiensia den dunamentu di kuido kon ke sea lo sigui ta un tema importante. Un pregunta klave ta kon por mantené e oferta di kuido na nivel ku ménos personal di kuido. Tambe e ta hiba na e pregunta kiko un komunidat por òf lo mester proveé entre nan, i unda e enfermeria òf e kuido médiko real ta bira nesesario. No por spera ku tur kos mester bini di un gobièrnu einan; lo hasi un apelashon riba e sosiedat sivil i e komunidatnan pa duna sosten konkreto. Esei ta pidi preparashon i palabrashonnan, pero partikularmente tambe maneho di espektativa i pues un kòmbersashon na tempu tokante kon pa organisá esaki. Tambe sosten ku teknologia digital pa hasi konosementu di salubridat òf servisio digital real riba distansia aksesibel, por aliviá e demanda kresiente di kuido relashoná ku

enbehesimentu; esaki ta nifiká preparashon di un mihó infrastruktura digital, sí.

Enbehesimentu ta ora speranza di bida i kantidat di yu ta bini huntu. Pero e delaster punto ei no ta enserá e posibilidat pa kambia e realidat di e enbehesimentu kresiente. Fuera di e punto ku yunan èkstra den e 20 òf 30 añanan benidero lo no òf práktikamente no influensia e preshon di enbehesimentu, sigun su índole, kantidat di yu ta un eskoho di e hendenan mes. Sí ta importante pa wak bon riba hende ku tin gana di haña yu, pero dor di falta di seguridat di eksistensia no ta skohe òf no por skohe pa esei.

2. Migrashon

Kresementu di poblashon dirigí na Boneiru, Sint Eustatius i Saba pa kada isla ta rekerí un aserkamentu koherente di migrashon, komo un aspekto desisivo di tamaño di e poblashon den e periodo benidero. Un aserkamentu koherente ta surpasá tereno, pasobra diferente tereno di maneho ta faktornan ku ta sea promové òf stroba migrashon (faktornan push òf pull). E ekonomia—i mas spesífikamente ainda, e demanda di labor—ta e faktor di empuhe di mas importante tras di migrashon for di i pa Hulanda Karibense. Tin otro motivashonnan ku tambe tin un papel den migrashon, manera e posibilidatnan limitá di hóbennan pa sigui enseñansa mas aleu na e islanan BES. Esaki ta rekerí eskohonan stratégiko tokante e futuro struktura ekonómiko deseá riba kada un di e islanan, unda ta duna preferensia na invertí den kupo di trabou ku ta yuda karga e prosperidat amplio di e komunidad. Ku esaki, e komishon di estado ta referí na un aserkamentu di migrashon ku ta hasi esfuerso pa fortalesimentu di e fasilidatnan esensial (kuido, enseñansa, suministro di kuminda) i pa empleo di kalidat haltu ku ta kontribuí na seguridat di eksistensia di hende. E aserkamentu aki ta tokante kada aspekto i pues mes tantu tokante e klima di estableimentu pa henter e famia eventual di e profeshonal den kuido òf e dosente komo tokante bon kondishon laboral i sosten den e proseso di migrashon berdadero. Ehersé influensia riba e faktornan ku ta promové òf stroba e migrashon aki, manera sosten pa bon alohamentu pa profeshonnan esensial ta un forma di perspektiva di aktuashon importante. Tambe lo e por pidi un adaptashon di e maneho di migrashon aktual, por ehèmpel dor di skrapmentu konkreto di e eksonerashon adishonal BES ku dòkternan i otro profeshonalnan den kuido (ku ya ta inkluí den e registro legal BIG pa Hulanda Oropeo) mester pidi.

Kua adaptashonnan di maneho den e proseso di migrashon eksaktamente ta nesesario, ta na e polítikonan pa elaborá, pero e meta ta kla. Aktualmente, binida di un migrante laboral na Saba hopi biaha ta dura seis luna òf tin biaha un año, siendo ku hopi biaha e ta bai tin un funshon esensial den e tráfiko sosial (pensa na kuido

òf enseñansa). Tin biaha ku e konsekuensia ku ta bandoná e idea di migrashon. Ounke ta trata di kantidatnan chikí di e tipo di migrantenan aki, Saba, pero tambe Sint Eustatius, ta hopi dependiente di un prosedura di migrashon ku aktualmente ta eksperensiá komo hopi slo. Na Boneiru, tantu e pregunta kon por aselerá migrashon pa funshonnan esensial tin un papel tambe, komo, mirando e kresementu muchu mas fuerte di e tamaño di poblashon, moderashon/redukshon tambe. Un eskoho stratégiko tokante den kua aktividat lo invertí èkstra den e periodo benidero—loke ta pas ku *slow growth*—i kua hustamente mester frena, ta esensial pa prosperidat amplio riba término mas largu. Na esaki tambe, e mehorashon di e proseso di migrashon ku a kuminsá, por ehèmpel rondó di funshonamentu di e eksigensia di rekursu, lo por i mester duna un kontribushon. En breve, pa Boneiru, kresementu dirigí partikularmente ta rekerí haña kontrol di e moveshonnan di migrashon aktual, tantu regular komo iregular, pero tambe aselerashon di e migrashon unda ta trata di funshonnan importante riba tereno sosial i pa eskohonan ekonómiko, tambe den bista di e urgensia di turismo riba e isla.

Di pursi, migrashon i turismo ta trese un demanda mas grandi pa alohamentu, infrastruktura i fasilidatnan di utilidat, i ta imponé un peso mas grandi riba naturalesa. I siendo ku por ehèmpel ya tin listanan di espera pa konstrukshon di bibienda sosial na e islanan BES. Ademas, tin diferensianan konsiderabel entre e variantenan di poblashon ora ta trata di e kantidat di bibienda èkstra ku mester konstruí. Esaki ta rekerí fleksibilidat, i pa inklui e tipo di konsiderashonnan aki den formashon di un vishon pa migrashon i turismo. Konstrukshon di bibienda nobo i tambe ekstenshon di e infrastruktura i hasi generashon di energia mas sostenibel tur ta pidi espasio, ku ta skars. Ademas, konservashon di naturalesa ta importante for di un punto di bista ekonómiko, sosial i ekológiko.

Primordial ta ku e isla su nesidat di prosperidat amplio mester ta indikativo pa atrakshon di migrante. E ora ei migrashon no ta solamente un resultado di tur movimentu di migrashon ku tin, òf mas tantu dirigí pa supinteres ekonómiko, manera e demanda for di e sektor di turismo. Migrashon di *lifestyle* tambe, den bista di e eskala chikí i, huntu ku esei tambe e vulnerabilidat di e islanan, ta pidi un midimentu proaktivo en relashon ku kua preshon riba e isla ta di deseá, i te kon leu tambe lo pidi un aporte di sosiedat. Fuera di regla, perspektivanan di aktuashon relashoná ku esaki tambe ta komunikashon proaktivo tokante esaki, i maneho di espektativa for di e sosiedat pa posibel migrante di *lifestyle*. E proseso di duna atenshon na *onboarding* (akohida) di migrantenan den sosiedat, inkluso atenshon pa siudadania —komplementando regulashon i influensia di faktornan ku ta promové i stroba esaki— tambe ta ofresé posibilidatnan ku por laga e impakto di migrashon dirigí ta algu positivo.

Finalmente, remigrashon di habitante di e isla ta meresé atenshon, entre otro en bista di hóbenan ku ta hala bai pa motibu di falta di posibilidat di desaroyo. Konsiderando e desaroyonan demográfiko manera deliniá den e informe aki, e impakto ku e skarsedat riba merkado laboral ya tin kaba riba e funshonnan esensial den e komunitatnan insular i e echo ku islanan chikitu sigun nan naturalesa ta trese gastu mas haltu, mester mira esaki for di un nivel di urgensia nobo. No ta bai pa e echo ku un futuro un otro kaminda no por ta bunita i bon; pero a base di e interes di e isla, sigui ku un bista organisá riba e diáspora i tene kontakto kuné ta un komienso. Adishonalmente, por pensa na posibilidatnan unda e gobièrnu i/òf e komunitat ta kontribuí (finansieramente) na e gastunan di un estudio un otro kaminda, ku e palabrashon di remigrashon pa Hulanda Karibense pa un periodo di algun aña despues di kompletá esaki. Pero tin otro inisiativa ku por yuda tambe, manera un kolaborashon unda habitante anterior di e isla ainda ta sigui desplegabél komo ‘reserva’ profeshonal pa proyekto temporal òf sosten di kontenido (sea ku ta digital, sí òf nò). Ta djis algun ehèmpel, pero den e kantidatnan chikitu, proyektonan asina por hasi un diferensia grandi. E prioridat ku remigrashon tin den bista di e komishon di estado, ta pone ku den sentido finansiero tambe lo mester wak esaki diferente, esta en bista di posibel gastu sosial èkstra den futuro, partikularmente dor di enbehesimentu.

3. Fasilidatnan públiko i eskala chikí

Debí na e tamaño di su poblashon i su ubikashon, Hulanda Karibense pa definishon tin di haber ku un oferta relativamente limitá di fasilidat públiko ku ta mas karu, debí na e sirkunstansianan manera eskala chikí. Te na sierto grado, esaki ta parti di bida riba un isla. Pero tumando desaroyonan demográfiko i mantenshon di prosperidat amplio na kuenta, diferente punto ta pidi akshon, sí. Manera deskribí akiriba, fasilidatnan básiko manera kuido i enseñansa di pursi ta kore mas i mas peliger.

Mester adaptá e oferta den kuido mas aleu na e enbehesimentu benidero i e kresementu di poblashon sperá pa kada isla. Tambe, e pobreza bou di un parti konsiderabel di e poblashon ta tradusí su mes—sigur den e último añanan di bida—ainda mas den un vulnerabilidat hopi mas grandi. Manera a enfatisá repetidamente den e informe aki, preparashon na tempu riba e konsekuensianan di enbehesimentu mas aleu ta hopi importante, tambe konsiderando posibel situashonnan agudo na e islanan BES en bista di esaki. E importansia di kuido pa mucha i hóben i salubridat públiko tambe ta krese den e añanan benidero.¹⁵ Fuera di un vishon di e situashon di salubridat aktual di e islanan, tambe e ta pidi un deskripsjon di e kapasidat di kuido nesario den e añanan benidero. Pa e motibu aki ta nesario pa

hasi palabrashonnan tokante kon pa organisá esaki, siendo ku maneho di espektativa ta un aspekto importante.

E papel importante di organisashonnan no gubernamental den e kuido sosial na e islanan, hopi biaha ku un trasfondo den trabou di boluntario i dependiente di supsidionan, tambe tin un lugá den esaki. Di un banda tin e balor grandi di e sosiedat sivil aki, di otro banda e no mester hiba na fragmentashon di kuido dor di un kantidat grandi di fundashon ku metanan komparabel. E skarsedat den e oferta (di kuido) ademá ta enfatisá ku, paden pero sigur tambe pafó di e fronteranan di Hulanda Karibense lo mester buska kolaborashon mas aleu. Sigur den e *cure* (tratamentu dirigí riba sanashon) ya por papia di suministro di kuido na otro islanan, kaminda e kuido ta bira muchu kompliká pa e oferta eksistente. Bonerianonan tambe ta dependé di fasilidatnan na Kòrsou (i Colombia) i hende sabano i stashano di Sint Maarten i otro islanan den serkania. Den tur probabilidad lo bai spera ainda mas di e kolaborashonnan aki, siendo ku aktualmente tambe ya tin e retonan nesario den por ehèmpel sinkronisashon operashonal i buelonan ku mester tuma lugá. Ta importante pa mira esakinan i posibel kolaborashonnan nobo den kua tambe ta kompartí servisionan di kuido entre islanan BES òf ta lanta nan huntu, a base di e desaroyo demográfiko ku ainda ta na kaminda. Hasi esei konkreto na tempu ta pidi esfuerso di un kantidat di partido i profeshonal. Ta na e direktiva i e komunidat tambe pa tuma e inisiativa pa esei. Posibilidatnan teknológiko den komunikashon i suministro di kuido tambe por kontribuí na mehorashon di e oferta di kuido.

Pa loke ta toka enseñansa, no ta asina ku tur kos ta posibel riba e eskala di e islanan. Pero ta opvivo ku e oferta aktual pa sigui studia no ta sufisiente pa hiba hóbenan na un desaroyo kompleto. Un aserkamentu adishonal ta nesario pa kaba ku e bareranan ku tin pa konektá ku enseñansa den e region i otro kaminda, inkluso Hulanda Oropéa.¹⁶ Enseñansa di idioma adekuá, pero tambe guia tokante kiko hasi un estudio den un alrededor kompletamente diferente ta nifiká pa bo, ta algun ehèmpel di esei.¹⁷ Konektá e estudionan hasi ku funshonnan ku ta importante pa prosperidat amplio, ta meresé prioridat mas aleu. E oferta di formashon di dosente pa enseñansa primario i sekundario dor di Universidat di Kòrsou na Boneiru i un estudio di kuido na Sint Eustatius ku por kompará ku mbo nivel 2 ta bon ehèmpelnan di esei.

Pa por duna servisionan públiko permanente na siudadanonan di Hulanda Karibense, mester tin atenshon kontinu pa renobashon di e kapasidatnan operashonal di organisashonnan (fondonan, personal, infrastruktura) i mantenshon di mankomunidatnan entre organisashonnan lokal, tantu gubernamental komo

no gubernamental. Kolaborashon i spesialisashon komun tambe (entre otro den enseñansa, kuido), tantu den Hulanda Karibense komo den e Reino, komo e region karibense mas amplio, por kontribuí na mantenshon i fortalecimento di fasilidatnan. Di e manera aki, por organisá algu di eskala, loke ta baha gastu pa islanan ku ta manda í ku ta risibí. Den kaso di servisio mas spesialisá tambe por papia di empleo mas spesialisá—i generalmente mihó pagá. Asina, por bira mas atraktivo pa hóbennan pa tòg bai traha na Hulanda Karibense i no buska trabou otro kaminda. Manera a ilustrá kaba bou di e perspektivanan di aktuashon pa migrashon, (re)migrashon dirigí tambe por ta un parti di e pùzel pa kombatí skarsedat na lugánan importante i stimulá prosperidat amplio.

Fuera di un esfuerso pa stimulashon di buelta di hóbennan ku a emigrá, un invershon den e fasilidatnan pa hóbennan tambe lo ta nesario. Konektá e bida insular riba deseonan i nesidatnan di hóbennan no ta un asunto di kompashon, pero ta konosé un nesidat i urgensia demográfiko fuerte. Posibilidatnan di rekreashon, oportunitat pa hasi deporte, pero tambe posibilidatnan di desaroyo pafó di skol i un infrastrukutura digital básiko sólido tambe mester ta parti di e vishon riba término largu.

Finalmente, mas outosufisiensi ora ta trata di kuminda i energia por ta faborabel pa poder di kompra di kasnan di famia, stabilitat di e ekonomia, salú di e poblashon, i empleo lokal. Mester tin espasio pa esaki sí, i mester hasi eskohonan tokante esei en konekshon ku otro metanan espasial (bibienda, naturalesa, infrastrukutura, fasilidat di utilidat, turismo). Un ekonomia mas diversifiká ta baha e sensitividat pa koyuntura i shòk, ountá e chèns riba empleo adekuá pa e propio hubentut, i ta duna mas posibilidat pa kresementu di produktividat i ku esei, kresementu di entrada i mas seguridat di eksistensia. No ta fásil pa realisá esaki, debí na e eskala chikí di e islanan. Tòg, ta posibel pa pensa por ehèmpel riba produkshon lokal di kuminda i energia. Riba tur tres isla ya por papia di inisiativanan (partikularmente di eskala chikí); por sigui konstruí esakinan mas aleu. Ademas ta importante pa enfatisá ku outosufisiensi total pa kada isla no ta realístiko, pero ku riba algun tereno sigur ainda tin tereno pa gana, loke lo fortalese e elastisidat.

4. Governance

E urgensia ku e tareanan demográfiko den e periodo benidero ta demostrá ta grandi, i e nesidat pa traha riba e kambionan sosial benidero for di koherensia ta evidente. Esei no ta un

tarea fásil. E ta pidi hopi di e manera ku ta guia perspectiva di aktuashon. Implementashon efikas di kambionan grandi di un manera efektivo ta pidi puntualidat, sosten, i un sierto grado di konfiansa. Un elemento fundamental ku ta importante pa konfiansa ta un bista komun di e situashon aktual i di kiko e tarea ta. En breve: un bista kla ku e sosiedat ta sinti i komprondé. Esei ta pidi pa mandatarionan aktivamente buska di dialogá i duna splikashon. Konosementu i komprondementu di e desaroyonan di mas importante, e faktornan tras di nan, i un bista tokante e konsekuensianan sosial awor i despues ta krusial komo base pa uso adekuá i bon komprondé di instrumento (di maneho). P’esei, e komishon di estado ta enfatisá e importansia pa aktivamente buska e diálogo sosial aki den e tempu benidero.

Un infrastrukutura di konosementu robusto tambe ta nesesario. Manera a indiká promé den e informe aki, tin partinan kaminda falta dato tokante desaroyonan demográfiko na Hulanda Karibense, òf un bista di hopi aña tokante e desaroyonan aki. E komishon di estado enfátikamente ta boga pa investigashon mas aleu i pa enfoke mas amplio riba e responsabilidat di investigashon riba tereno di desaroyo demográfiko na Hulanda Karibense di parti di Reino i su institushonnan. Un posishon di informashon konstruí strukturalmente durante un periodo mas largu lo ta esensial pa, tambe den e añanan benidero, bini na formashon di agènda, i pa por supli un kontesta adekuá pa desaroyonan demográfiko kada bes di nobo. E informe aki ta un komienso pa esaki, no un fin.

Parti di e infrastrukutura di konosementu aki tambe ta monitoring adekuá í formashon di agènda periódiko di e kompreshon aki komo informashon di maneho na nivel gubernamental. Por ehèmpel ku e saber si en bèrdat lo konstruí sufisiente bibienda pa grandinan i otro gruponan di enfoke i kon lihé nan lo ta disponibel. Mirando esei, e inisiativa di e ministerio di BZK pa huntu ku CBS bini na un dashboard pa bibienda popular, ta meresé sosten. Pero tur esaki ta enserá mas ku mantené un bista di e suptópikonan. Monitoring amplio di kambionan demográfiko por i mester haña un lugá den e toma di desishon regular tokante maneho nobo pa Hulanda Karibense. Un grupo di guia konsistiendo di institushonnan di konosementu i conseheronan (independiente) lo por duna sosten pa organisá i guia esaki.

Desaroyonan demográfiko tin un efekto riba tur tereno. P’esei, e forma di trata ku e kambionan aki tambe tin efekto riba hopi tópiko sosial pareu. Enbehesimentu ta intensifiká e eskases riba un merkado laboral ku ta vulnerabel kaba, unda sifranan chikitu por nifiká diferensianan grandi pa komunidatnan. Na mes momentu, e ta oumentá e preshon riba

fasilitatnan di kuido, tambe riba e manera ku grandinan ta enbehesé, i ta pone ku e tipo di bibienda ta bira problemátiko mas lihé. Hasi esfuerso pa prosperidat amplio ta tokante eskohonan kon pa hasi uso di e tiki espasio ku tin, i pa kua aktividat ekonómiko òf sosial. E periodo benidero ta pidi trabou dirigí a base di enkargo ku ta surpasá tereno, no guia i responsabilisashon pa kada suptópiko. Un agènda komun riba término largu ta nesesario. Konsentrashon gubernamental kolektivo dirigí riba aselerashon di prosperidat amplio, ta di esei e ta trata. Ku atenshon í rekursonan konsentrá riba e enkargonan sosial sentral, manera: ‘preparashon riba enbehesimentu mas aleu’, ‘reorientashon ekonómiko riba migrashon dirigí’ i ‘kontinuidat di fasilitatnan públiko den e eskala chikí di Hulanda Karibense’. Un aserkamentu dirigí riba enkargo ta pidi pa pone responsabilidatnan ku awor generalmente ta repartí entre diferente supterenó mas tantu den ún man. Asina ta bira posibel pa aserká tareanan sosial den henter e área i pa trese e kompetensianan nesesario huntu. E aserkamentu (sigun un programa) aki ta rekerí pa e sosiedat sivil i e sektor komersial tambe partisipá den palabrashonnan tokante esaki, i tokante kua aporte nan mes lo duna den e añanan benidero, na kaminda pa prosperidat amplio. Trahamentu huntu di e forma aki tambe ta hasié posibel pa apsorbé e shòknan ora e desaroyonan ta resultá di ta diferente. Por ehèmpel ora surgi kambio den e movementunan di migrashon, ora paisnan bisiña diripiente kambia e maneho di migrashon òf den kaso di konflikto regional.

No ta parse ku a organisá e *governance* aktual orientá riba problemátikanan sosial ku ta surpasá tereno. Gobièrnu Sentral ta ordená a base di departamentu i asina ta traha huntu ku un gobernashon ku atrobe ta integral i desentral. Ademas, e Entidatnan Públiko di eskala chikí di un banda ta igualá munisipionan (chikí), pero na mes momentu sí tambe ta responsabel pa un aeropuerto internashonal i hafnan marítimo ku ta adekuá pa importashon internashonal, eksportashon, i turismo (krusero). E peso di tarea versus preparashon pa e tareanan ei ta pidi atenshon. Fortalesimentu di e organisashonnan ofisial—konsiderando e enkargonan ku ta na kaminda—tambe ta nesesario. No nesesariamente ku funshonnan fultaim permanente, pero e ta posibel tambe via otro forman manera formashon di poule (gruponan di trahadó) den e islanan BES (i pafó di nan) pa kompetensianan spesífiko manera empleado finansiero òf spesialisista espasial. Tambe por pensa di un un grupo di empleado mas fleksibel ku por pone traha temporalmente, ku ‘empleado reserva’ gubernamental òf ofisial ku por pone traha rondó di proyektonan—sea di forma digital òf nò. Esakinan ta algun ehèmpelnan konkreto, prinsipalmente pa suprayá e urgensia di fortalesimentu.

En breve, kombatí fragmentashon via koordinashon (tambe di areglonan) ku palabrashonnan kla tokante kolaborashon i responsabilidad final, ta hopi nesesario. Un momentu anual sentral ku tur esnan embolbí na nivel gubernamental por yuda ku evaluashon i fortalecimento di e aserkamentu aki. Ademas, ta sigui ta importante pa realisá ku na Boneiru, Sint Eustatius i Saba semper lo tin limitenan na loke ta posibel, tumando e eskala chikí na kuenta.

9.2 PA KONKLUÍ

Kon e desaroyo di poblashon na e tres islanan lo kana den e dékadan benidero, ta difísil pa pronostiká den kantidatnan eksakto. Bisto sí ta ku enbehesimentu mas aleu kon ku para ta un tema sosial importante, ku konsekuensianan riba hopi tereno. Tambe nos ta mira ku desaroyo riba diferente tereno mes tambe tin efekto riba e manera ku e enbehesimentu lo tuma lugá. Tambe, e dinámika rondó di migrashon (laboral) – ku un propio elaborashon pa kada isla – tin un influensia fundamental riba futuro di Hulanda Karibense, konsiderando mantenshon i fortalecimento di prosperidat amplio. Ademas, e posishon físiko i sirkunstansianan espasial vulnerabel di e islanan tin influensia riba e manera ku kada isla por dil ku e desaroyonan demográfiko deskribí. P’esei, kada isla tambe lo mester duna su propio contenido na kresementu dirigí.

Ademas, den e informe aki, konforme e desishon di institushon, por papia di sierto deformashon di perspektiva. E tarea ta orientá riba Hulanda Karibense i den e perspektivanan di aktuashon, komo resultado di e konteksto estatal, tambe sigur tin un sierto enfoke riba e relashon ku Den Haag. Pero manera tambe ta resultá for di e desaroyo históriko, e dinámika demográfiko tambe ta opviamente konektá ku Kòrsou, Aruba i Sint Maarten. Esaki tambe ta konta pa e region mas amplio, ku na parti sur di e islanan bou di biento entre otro Venezuela i Colombia i na parti nort di e islanan ariba un eskala mas amplio di islanan serkano. E komishon di estado ta enfatisá e importansia pa tambe konsiderá e konteksto mas amplio aki den e elaborashon mas aleu i kontinuashon di e informe aki.

E perspektivanan di aktuashon menshoná den e kapítulo aki ta suprayá importansia di maneho i akshon sosial ku, más ku awor, ta basá riba desaroyo riba término largu. Na mes momentu, ta esensial pa inkorporá fleksibilidad pa por adaptá e aktuashon ei, si akaso desaroyo di poblashon den e añanan benidero tòg sigui ku asento diferente.

Dor di dirigí atenshon konsekuentementa riba 2050, ademas ta posibel pa kontestá problemátikanan sosial den konteksto. Tambe, den e komunitatnan e ta trese e pregunta dilanti: ki tipo di sosiedat nos ke ta? Ta importante pa hiba e kòmbersashon tokante esaki na tempu, pasobra e ta kontribuí tantu na e konfiansa

mutuo entre habitantenan i gobernashon komo na espektativanan adekuá tokante futuro. Un kòmbersashon amplio tambe ta hasi kla kon diferente tópiko ta relashoná mutuamente ku otro. Asina, e falta di personal den fasilidatnan esensial tambe ta afektá e ekonomia i bon gobernashon. I no por hasi eskohonan espasial den isolashon, pa motibu di eskases konkreto di bibienda, enbehesimentu i seguridat di alimento, pero tambe desaroyonan eksterno maneraambio di klima.

P’esei tambe, wak dilanti sigur tampoko ta nifiká sinta warda. Al kontrario: e ta pidi aktuashon riba término korto, di moda ku eskohonan hasi tin efekto na tempu. Lógikamente, tambe mester tene kuenta ku e kapasidat finansiero di e gobernashon lokal i sosiedat sivil. Sigur tambe konsiderando e tarea konsiderabel ku e tres Entidatnan Públiko tin kaba pa motibu di nan eskala chikí, i adishonalmente, ku e responsabilidatnan riba e promedio kompará ku munisipionan di un tamaño komparabel. Ta kla ku mester fortalese e konosementu tokante e desaroyonan demográfiko na Boneiru, Sint Eustatius i Saba, partikularmente pa motibu di e nifikashon ku kompromedentum demográfiko tin strukturalmente na momentu di konsiderashonnan di maneho. Ta na e gabinete, Staten-Generaal i e Entidatnan Públiko pa hasi eskohonan konsiderabel. Ku e konfiansa i e konvikshon ku – ora prosperidat amplio ta e meta i kresementu dirigí ta e direkshon – ainda hopi kos ta posibel pa sigui duna forma na Hulanda Karibense di e manera deseá rumbo pa 2050.

- 1 WRR (2008), Alofs i Veneman (2010) i Oostindie i Veenendaal (2022)
- 2 Baldacchino i Veenendaal (2018) i Franken i Alofs (2022)
- 3 Veenendaal (2017) i Noordegraaf i Bakker (2023)
- 4 Hermans i Kösters (2019)
- 5 Tambe lesa Commissie sociaal minimum Caribisch Nederland (2023).
- 6 Elias i Scotson (1965)
- 7 Evertsz-Ipcendencia (2020)
- 8 RE-SETConsult (2018)
- 9 E komishon di estado ta enfatisá urgensia i importansia di e nesidatnan sosial manera deskribí mas aleu den Franken i Alofs (2022).
- 10 IOM (2024)
- 11 Franken i Alofs (2022); Inspectie van het Onderwijs (2023)
- 12 Alofs, Bant i Franken (2022)
- 13 Kiesraad (2023); ANP (2023) i Openbaar Lichaam Bonaire (2021)
- 14 Openbaar Lichaam Bonaire i Rijksoverheid (2024)
- 15 Wak por ehèmpel Kinderombudsman (2021).
- 16 Wak por ehèmpel e Strategic Education Alliance i e Beka di Reino.
- 17 Wak por ehèmpel Nationale ombudsman (2020b).